

Promoziun da la lavur voluntara

Benevol Grischun intermediéscha voluntariAs ad instituziuns ed organisaziuns

DA HANS HUONDER / ANR

■ **L'entschatta fanadur è vegnì en funcziun a Cuira il post d'intermediaziun Benevol Grischun, inizià da la Crusch cotschna dal Grischun. La finamira primara da quel è d'intermediar voluntariAs ad instituziuns ed organisaziuns dal pli different gener. Tenor la manadra Gabriela Schmid han surtut instituziuns socialas fatg diever enfin uss da la intermediaziun.** Quest atun ha Benevol Grischun – il post d'intermediaziun per lavur voluntara – aranschà ina retscha da referats en differents lieus dal chantun Grischun. Cun quels han las iniziantas ed ils iniziants vulì propagar lur purschida nova. Cun occasiun dad in da quels referats ha la manadra dal post, *Gabriela Schmid*, punctuà: «En la lavur voluntara duain il dar ed il prender tegnair la ballantscha. Dar per enritgir noss conturn e per s'angaschar a favur dad ina buna chaussa. Prender per uschia dar a la veta in nov senn ed ina cuntentientscha persunala enten retschaiver reconuschientscha ed engraziament.»

Crusch cotschna sco iniziata

Radund 20 chantuns en Svizra disponan dapi onns dad in post d'intermediaziun per lavur voluntara. En il chantun Grischun è ina tala idea vegnida discussiunada gia avant plirs onns. En ina circulara da la Crusch cotschna a bleras organisaziuns ed instituziuns dal sector dal nonprofit è sa mussà ch'in tal servetsch è giavischà. Sin fundament da quels resuns ha la Crusch cotschna fatg las preparati-



La manadra da Benevol Grischun, Gabriela Schmid, cun occasiun dad in referat. MAD

vas necessarias per la fundaziun dal post. L'entschatta fanadur 2005 ha il post – numnà Benevol Grischun – pudì vegnir avert. Ils motivs che la Crusch cotschna è s'engaschada per quest servetsch èn evidents. «La Crusch cotschna lavura gia cun fitg blers voluntaris ed è qua tras pertscharta da la necessitad da quels», di Gabriela Schmid. Ch'in tal post vegn stgaffi en il chantun Grischun cun retard

ha per la manadra differents motivs: «En las citads grondas è l'anonimitad bler pli gronda che tar nus, la gliued dovra in tal servetsch per vegnir infurmada. En pitschens vitgs muntagnards è la prontadad da sa gidar cun las organisaziuns, ma er cun ils vischins, pli gronda.» Ils onns 2005 e 2006 vegn Benevol Grischun finanzià sco project entras la Crusch cotschna dal Grischun. Uschè lunsch che

l'interess per la cussegliaziun è avant maun esi er prevì da stgaffir posts regiunals a lunga vista. Il mument vegn lavurà per l'entir chantun dal post da Cuira anor.

Interess è grond

«Dapi l'avertura da noss post avain nus gi bleras dumondas d'engaschament voluntar, surtut dad instituziuns socialas», di Gabriela Schmid. Uschè en s'annunziadas chasas da vegls e scolinas che na pon betg ademplir tut ils servetschs muort il squitsch da spargn: «Tar las chasas da vegls sa tracti per exempel d'incaricas da manar ils attempads tar il medi u far spassegiadas cun quels.» S'annunziadas èn dentant era ludotecas, organisaziuns per la protecziun da l'ambient ed instituziuns caritativas. L'intermediaziun da voluntaris è ina part dal servetsch da Benevol Grischun. In'otra pertutga

la tschertga activa da persunas ch'èn prontas da surprendre funcziuns e servetschs senza pajament. Per quest motiv ha il post er organisà quest atun differents referats: «Nus avain sapientivamain vulì orientar er en las differentas regiuns da noss chantun. Las persunas ch'èn sa participadas han demussà grond interess. Igl è naturalmain adina grev da cuntanscher tut ils interessents e da porscher ina saira ch'è adattada per tuts.» Il servetsch da Benevol na duai betg esser ina concorrenza per la fiera da lavur: «Nus lain naturalmain er intermediar voluntaris che disponan dad ina cumpetenza professiunala.» Gabriela Schmid aschunta in exempel: «Tar nus è ina dunna pensiunada s'annunziada. Damai ch'ella na dovra betg pli in'entrada è ella sa purschida da prestar lavur nunpajada. Ella ha savì vegnir intermediada ad in'organisaziun caritativa.»

Standards da la lavur voluntara

Renconuschientscha da la lavur voluntara: Voluntaris han il dretg dad ina reconuschientscha persunala e publica per lur prestaziun.

Cundiziuns da lavur: In engaschi na duai betg cuzzar pli ditg che quatter enfin sis uras per emna.

Accumpignament dals voluntaris: Voluntaris duain vegnir introducids en la lavur e lasuenter vegnir accumpignads professiunalmain.

Cunvegrientscha da l'engaschi: Ils voluntaris decidan sez areguard lur

lavor ed il cuoz da quella. Per engaschis che sa repetan vegn cusseglià da far ina cunvegrientscha.

Evaluaziun: La lavur voluntara duai vegnir evaluada.

Spesas ed assicuranza: La lavur voluntara na vegn betg pajada. Spesas da via-di, portos u telefons èn d'indemisar. L'assicuranza da responsabladad è da reglar avant l'entschatta da l'engaschi.

Attest da la lavur prestada: Las instituziuns documenteschan l'engaschi voluntar prestà en lur manaschis.